

Inatsisissatut siunnersuummut nassuiaatit

Nalinginnaasumik nassuiaatit1. Inatsisissatut siunnersuutip imaa

Pinerliiniarnernik akiuiniarneq siunertaralugu inunnt aalajangersimasunut aamma ataatsimoortunut peqqarniisaarnernut attuumassuteqartunut aningaasaqarnikkut pineqaatissiisarnissap atuutilersitsinissaanik nunanut Naalagaaffiit Peqatigiinni ilaasortaasunut pisussaaffiliisumik isumaqatigiissummik 1373-imik (2001) Naalagaaffiit Peqatigiit Isumannaallisaanernik Siunnersuisoqatigiivi akuersissuteqarsimapput.

Naalagaaffiit Peqatigiit Isumannaallisaanernik Siunnersuisoqatigiivisa isumaqatigiissutaanni 1373-mi pineqarput nalinginnaasumik pinerliiniarnernik akiuiniarneq, tassani pinerliiniarnernik pitsaaliunissamut akiuiniarmullu naalagaaffiit tamarmik Isumannaallisaanernik Siunnersuisoqatigiinnit kaammattorneqarlutik. Taamaattorli Naalagaaffiit Peqatigiit tungaanniit isumaqatigiissummut ilaatinneqartunik pinerliiniartunik aamma pinerliisartut suleqatigiiffii pillugit nalunaarsuiffimmik suliaqartoqarsimanngilaq. Taamaattumik aallaaviatigut kikkut isumaqatigiissummut ilaatinneqassanersut Naalagaaffiit Peqatigiinni nunat ilaasortaasut ataasiakkaat aalajangiisussaapput.

Nalunaarsuiffik 1373-imik taaneqartartoq EU-mi nunanit ataatsimoortumik kinaassusersineqarpoq Naalagaaffiit Peqatigiit isumannaallisaanernik siunnersuisoqatigiivisa isumaqatigiissutaata 1373-p naammassineqarnissaanut EU-p iluani ingerlaavartumik nutarterneqartarluni.

2. Pisortanut aningaasaqarnikkut allaffissornikkullu kingunissai

Pisortanut aningaasaqarnikkut allaffissornikkullu kingunissai annertussanngitsut nalilerneqarpoq.

3. Inuussutissarsiortunut aningaasaqarnikkut allaffissornikkullu kingunissai

Inuussutissarsiortunut aningaasaqarnikkut allaffissornikkullu kingunissai killeqangaatsiassasut nalilerneqarpoq.

4. Innuttaasunut aningaasaqarnikkut allaffissornikkullu kingunissai:

Innuttaasunut aningaasaqarnikkut allaffissornikkullu kinguneqassanngitsoq nalilerneqarpoq.

5. Naalagaaffeqatigiinnermut namminersorlutillu oqartussanut pissutsit

Siunnersuutikkut Namminersorlutik Oqartussat inatsisaat Naalagaaffeqatigiinnermi inatsisinut naleqqussarneqarput.

6. Oqartussanik suleqatigiiffinnillu tusarniaaneq:

Siunnersuut saqqummiunneqartoq ukunani tusarniutigineqarsimavoq:

Kanukoka, Grønlands Arbejdsgiverforening, Grønlands Landsret, Deloitte, Grønlands Revisionskontor, GrønlandsBanken, Nuuk Sparbank, If Forsikring Grønland, Codan Forsikring Grønland, PFA Soraarneq aamma Finanstilsynet.

Tusarniaanermi akissutinik tigusaqartoqarsimangilaq.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Suliffeqarfiit inuillu inatsimmut ilaatinneqartut tassaapput suliffeqarfiit inuillu nunat allat aningaasaannik taarsiisitsinermik, taarsigassarsisitsinernik, niuernikkut taarsigassarsisitsinernik, illunik tuniniaasartunik, suliffeqarfinnut kiffartuussinissamik neqerooruteqartarnermik inuussutissarsiutigalugu ingerlataqartut aamma inuit suliffeqarfiillu taamatut ingerlataqarnermut qanittumik ingerlataqartut kiisalu pigisanik tuniniaasartut.

§ 2-mut

Pinerliiniat nalunaarsorsimaffiat Udenrigsministeriap aamma Erhvervs- og Byggestyrelsen nittartagaannit takuneqarsinnaavoq, aammattaaq saaffiginnittoqarneratigut Inuussutissarsiornermut Suliffeqarnermullu Naalakkersuisoqarfimmit pissarsiarineqarsinnaalluni.

Kalaallit Nunaat pillugu Hvidvasksekretariatit Danmarkimi Hvidvasksekretariatimi inissisimavoq Statsadvokaten for særlig Økonomisk Kriminalitetimi (SUK), SPK-mut ilaanngikkaluarluni, illusimaffeqarluni.

Imm. 2. Suliani kinaassutsit atillu pinerliiniat nalunaarsorsimaffianiittunut assigiittoqartillugu tamanna ingerlaannartumik Hvidvasksekretariatimut nalunaarutigineqassaaq. Kinaassutsikkut assigiittoqarnerseq Hvidvasksekretariatimit nalunaarutigineqassaaq, aamma arsaarinnittoqassanersaq. Tamatuma paasineqarnissaata tungaanut aningaasanut aningaasaatitigut pigisanut imaluunniit aningaasatigut isumalluutitut pineqartunut isersinnaatitaasoqanngilaq.

Kinaassutsikkut assigiittoqarnera isumaqarpoq assersuutigalugu aningaaseriviup suliffeqarfiulluunniit paasisimagaa sullitani, suliffeqarfik, suleqatigiiffik imaluunniit sullitami nalunaarsuiffiani ateq inummullu paasissutissat pinerliiniat nalunaarsorsimaffianni atimut 100%-imik naapertuuttoqartoq.

Suliami atimik p pinerliiniat nalunaarsorsimaffianiittumik atimik assigiittoqarnera tamanna isumaqarpoq aningaaseriviup suliffeqarfiulluunniit paasisimagaa sullitaqarluni, pinerliiniat nalunaarsorsimaffiini atimut imaluunniit aningaasaqarnikkut pineqaatissiisarneq pillugu peqqussutini allani atit allatorsimaffiini atia tamakkiisumik ilaannakuusumilluunniit naleqquttoq.

Imm. 3. Kalaallit Nunaanni tiguseqqusinnginnissamik pisussaaffik Kalaallit Nunaanni Pinerluttulerinermik inatsit aamma Kalaallit Nunaanni Eqqartuussisarnermi inatsimmi arsaarinninnermi malittarisassat malillugit naammassineqassaaq.

Ilaatigut aningaasanik tiguseqqusinngitsoqarsinnaavoq tamannalu isumaqarluni annertussusaanik, aningaasanik, inissisimaffinik, piginnittunut tunngasut, tigummiat, suunerisa aalajangersakkallu allannngortinnerannik kinguneqartut imaluunniit allannguinerit allat suugaluartulluunniit, pineqartunik atuilersitsinnaasut aningaasanik nikisitsinerit, nuussinerit, allannguinerit atuinerluunniit suulluunniit akornuserneqartut.

Taakku saniatigut aningaasanik isumalluutitigut tiguseqqusinngitsoqarsinnaavoq tamannalu isumaqarluni aningaasanik, nioqqtissanik kiffartuussinernilluunniit sutigulluunniit atuisinnaanerit akornuserneqartut, taakkunungali ilaannngillat tunisinerit, attartornerit imaluunniit taarsigassarsianut sallunaveeqqusiinerit.

§ 3-mut

Pinerluttulerinermik inatsimmi (inatsit nr. 306, 30. april 2008-imeersoq) pineqaatissiinermi aalajangersakkat tassaapput §§ 26, 30 aamma 170.

Pinerluttulerinermik inatsimmi § 26-mi pinerluttuliorninngortippai aalajangersakkanik imaluunniit inerteqqutinik piaaraluni imaluunniit mianersuaalliorluni unioqqtitsinerit, inatsit malillugu Naalagaaffiit Peqatigiinni ilaasortatut naalagaaffeqatigiit pisussaaffinik naammassineqartussaasut.

Pinerluttulerinermik inatsimmi § 30-mi pinerluttuliorninngortippai pinerliiniarnernik ingerlataqarnernik imaluunniit iliuutsit tassunga attuumassuteqartut toqqaannartumik

toqqaannangitsumilluunniit aningaasatigut tapiiffigineqartut imaluunniit aningaasanik pissarsinikkut katersinikkulluunniit taperserneqartut imaluunniit toqqaannartumik toqqaannangitsumilluunniit aningaasaliiffigineqartut, aningaasaatinik pilersorneqartut imaluunniit aningaasaatitigut allatigulluunniit kiffartuussinikkut pinerliiniarnernik suleqatigiiffinnut atorineqartussanngortinneqartut.

§ 70 tassaavoq pinerluttulerinermik inatsimmi arsaarinnineq pillugu aalajangersagaq.

Eqqartuussisarnermi inatsimmi (inatsit nr. 305, 30. april 2008-imeersoq) aalajangersakkat attuumassuteqartut tassaapput arsaarinnittarnerit ilaalu ilanngullugit kapitali 37-mi nassaarineqarsinnaasut.

§ 4-mut

Siunnersuutigineqarpoq inatsit ulloq 1. juni 2010-imi atulersinneqassasoq.